



11. Maj 2017

Aalisarneq pillugu Inatsisartut Inatsisaat allanngorteqqullugu imaalillugu Kalaallit Nunaata kitaani raajanut TAC-ip agguarneqarnerani sinerissap qanittuani aalisartunut avataasiortunllu assigiimmik 50/50-nngortillugu suliareqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasortaq Nikolaj Jeremiassen, Siumut)

Siullermik siunnersuuteqartoq, Nikolaj Jeremiassen, Siumut qutsavigaarpuit siunnersuutaanut.

Siumumiit pingaartilluinnarpalput, nunatsinni aalisarnikkut, uanili raajarniarnikkut periarfissat siammasissut, aammalu aalisartunit amerlanerpaanit peqataaffigineqartunit periarfissaqartitsineq. Nunatta imartaani pisuussutivut inuiaqatigii tamarmik pigivaat. Aammalu isumatuumik, inuiaqatigiinnullu amerlanerpaanut iluaqtissanngorlugit atorneqarnissaat pingaaruteqarluinnarpooq.

Ukiorpanngortuni raajat pillugit oqallinnerit annertuut ingerlasarsimapput, tupinnanngitsumik, nunatta tunisassiornikkut pingaarnersaanni oqallinnerit siammasissut pingaaruteqartut pisarmata. Siumumiillu erseqqissumik oqaatigissavarput, nunatsinni aalisarnikkut pisuussutitsinnillu atuinatsinni, aalisartut amerlanerpaat periarfissinnerisigut inuussutissarsiornikkut siuarsaaneq aamma aqqutissiuukkusukkatsigu.

Siumumiit aamma oqaatigerusupparput, raajaqarfennik nutaanik misileraanerit ukiut kingulliit ingerlanneqartut, pingaartumik avannaani qimusseriarsuarmi neriuulluarnartumik takutitsimmata, taamaat-tumillu aamma Siumumiit Naalakkersuisunut kaammattuutigissavarput, sumiiffiit amerlanerusut, aammalu siammasinnerusut misileraaffigineqarnissaannut, pilersaarummik suliaqarnissaannik. Maannamummi killiffik siunissamut neriuulluarnartumik isikkoqarpoq.

Siumumiit aamma pingaartillugu innersuussutigissavarput, pisariaqassamat siunnersuutip piviusungortinnissaanut, piffissamik, ukiunik arlalinnik ikaarsaariarfegarnissaq, matumuunalu innersuusutigissavarput ukiunik tallimanilluunniit (5) ikaarsaariarfegassasoq, taamaasiornikkut naleqqusaanerit pisariallit piffissap iluani ingerlanneqarsinnaammata.

Naggataatigut Siumumiit innersuussutigissavarput, Naalakkersuisut akissuteqaammini oqariartuutigisaat, tassalu ukiamut aalisarnermut inatsit nutaaq saqqummiutissallugu oqariartuutigimmassuk, uuma siunnersuutip aalisarnermut inatsisisamut ilanngullugu qilattaallugu suliarineqarnissa, siumumiit taperserparput.

Taamatut oqaaseqarluta, siunnersuut akuersaarparput.

Knud Kristiansen
Siumut.